

**Bil. 6**

**Isnin**

**25 Mac 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT PERTAMA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Pertanyaan Mengenai Penutupan Sekolah Berikutan Kejadian  
Pembuangan Sisa Kimia**  
- *YB. Dato' Dr. Noraini Ahmad (Parit Sulong)* [Halaman 1]
- **Isu Scammer**  
- *YB. Dato' Sri Dr. Santhara (Segamat)* [Halaman 5]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT PERTAMA**

**Isnin, 25 Mac 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Pertanyaan Mengenai Penutupan Sekolah  
Berikutan Kejadian Pembuangan Sisa Kimia**

**2.34 ptg.**

**Dato' Dr. Noraini Ahmad [Parit Sulong]:** Terima kasih Tuan Yang di Pertua. Tuan Yang di-Pertua, saya ingin mengemukakan usul kepada Yang Berhormat Menteri Pendidikan berkaitan status penutupan operasi Sekolah Kebangsaan Pasir Putih dan Sekolah Menengah Kebangsaan Pasir Putih sehingga 10 Mac 2019 berikutan kejadian pembuangan sisa kimia secara haram di Sungai Kim Kim yang terletak berdekatan dengan kawasan sekolah tersebut.

Terdapat pelbagai versi laporan media yang tular, ada yang melaporkan 11 mangsa keracunan gas kimia kini sedang mendapatkan rawatan di Hospital Sultan Ismail (HSI), ada juga yang menyatakan jumlah mangsa yang mendapatkan rawatan di HSI mencecah 47 orang dan ada juga portal yang turut melaporkan sembilan daripada mangsa kini dirawat di ICU. Jadi, saya ingin mohon penjelasan Yang Berhormat Menteri mengenai status sebenar, berapa ramai mangsa yang terjejas kesan daripada insiden tersebut?

Seterusnya, adakah pihak kementerian telah mendapat pengesahan daripada Jabatan Alam Sekitar yang bahawasanya kawasan sekolah tersebut telah bebas dari ancaman sisa kimia dan selamat untuk beroperasi semula pada 11 Mac 2019? Ini kerana, ada sebahagian guru yang berpendapat keputusan tersebut mungkin akan membahayakan nyawa warga sekolah terbabit kerana Jabatan Alam Sekitar pada ketika itu masih belum mengesahkan tahap pencemaran di kawasan sekolah tersebut.

Malah, arahan yang dikeluarkan agar guru-guru hadir untuk sesi gotong royong pada 10 Mac 2019 juga mengejutkan kerana ia mungkin membahayakan kesihatan para guru ketika itu kerana tiada langkah keselamatan yang telah dijalankan. Arahan itu dilihat seperti melanggar Akta Keselamatan dan Kesihatan Pekerjaan 1994. Ia dibuktikan juga dengan terdapat kenyataan keluarga mangsa yang tular mengenai kondisi mangsa pencemaran yang semakin teruk di ICU kerana sisa bahan kimia telah menjangkiti buah pinggang.

Oleh itu, saya minta penjelasan dari pihak kementerian mengenai perkara ini dan apakah langkah drastik yang telah dilaksanakan bersama Jabatan Alam Sekitar bagi memastikan kesihatan dan keselamatan warga sekolah terbabit akan terus terjamin dan adakah pihak kerajaan bersedia memberi sebarang pampasan kepada mangsa yang terkesan dengan insiden tersebut khususnya yang terlantar di ICU? Sekian, terima kasih.

### **2.36 ptg.**

**Timbalan Menteri Pendidikan [Puan Teo Nie Ching]:** Terima kasih Tuan Yang di-Pertua, terima kasih Ahli Yang Berhormat. Tuan Yang di-Pertua, Kementerian Pendidikan Malaysia mengucapkan terima kasih kepada Ahli Yang Berhormat Parit Sulong terhadap keprihatinan beliau berkaitan penutupan sekolah berikutan kejadian pembuangan sisa kimia.

KPM memandang serius dan menzahirkan perasaan dukacita kerana insiden tersebut memberi kesan yang besar kepada warga sekolah khususnya dan masyarakat Pasir Gudang secara amnya. KPM perlu menjelaskan tentang perkara ini atas dasar KPM bertanggungjawab terhadap keselamatan dan kebajikan warga sekolah (murid dan guru) dan langkah segera yang diambil bagi menghadapi musibah di Pasir Gudang tempoh hari. KPM telah bekerjasama erat dengan Kementerian Kesihatan Malaysia, Kementerian Tenaga, Sains, Teknologi, Alam Sekitar dan Perubahan Iklim, Jabatan Bomba dan semua pihak berkuasa yang lain untuk memastikan keselamatan murid, guru dan pekerja sekolah menjadi keutamaan.

Tuan Yang di-Pertua, penutupan sekolah kebangsaan (SK) dan sekolah menengah kebangsaan (SMK) Taman Pasir Putih, pada awal pagi 7 Mac 2019, sesi persekolahan berjalan seperti biasa di SK Taman Pasir Putih dan SMK Taman Pasir Putih, Pasir Gudang Johor. Pada jam 7.30 pagi, pihak sekolah menghubungi Jabatan Bomba kerana murid dan guru menghidu bau yang tidak menyenangkan. Pihak Bomba datang membuat penilaian kualiti udara dan mengarahkan premis sekolah dikosongkan.

Pada jam 10.15 pagi, Jawatankuasa Pengurusan Bantuan Bencana Daerah (JPBBD) Johor Bahru telah digerakkan. Ibu bapa dan penjaga diminta mengambil anak masing-masing di sekolah. Murid yang mengalami simptom seperti loya, muntah dan sesak nafas dihantar

segera ke hospital untuk rawatan. Bilangan murid SK Taman Pasir Putih yang mendapat rawatan ialah 17 orang (11 dimasukkan ke wad dan enam pesakit luar). Manakala 18 murid SMK Taman Pasir Putih terlibat dengan 15 orang dimasukkan ke wad dan tiga orang sebagai pesakit luar. Pada jam 8.00 malam, JPBBB telah bermesyuarat dan menasihatkan Jabatan Pendidikan Negeri (JPN) Johor menutup kedua-dua buah sekolah tersebut selama tiga hari sehingga 9 Mac 2019 (Sabtu).

Pengesahan Keselamatan Sekolah pada 9 Mac 2019, untuk makluman Ahli Yang Berhormat, Mesyuarat JPBBB yang turut melibatkan Jabatan Alam Sekitar (JAS) diadakan pada 9 Mac 2019. JPBBB mengenal pasti punca pencemaran adalah disebabkan pembuangan sisa bahan kimia di anak Sungai Kim Kim.

#### ■1440

Mesyuarat memutuskan kedua-dua sekolah berkenaan adalah selamat dan mencadangkan kerja pembersihan sekolah dilaksanakan pada hari Ahad 10 Mac 2019 iaitu semasa sekolah masih ditutup. Langkah itu diambil atas faktor keselamatan murid, guru dan pekerja sekolah. Berdasarkan nasihat JPBBB, Pendaftar sekolah JPN Johor memutuskan kedua-dua sekolah berkenaan akan dibuka dan beroperasi pada Isnin 11 Mac 2019.

Gotong Royong di SK Pasir Putih dan SMK Pasir Putih. Berdasarkan nasihat JPBBB dan dengan kerjasama pelbagai agensi, Persatuan Ibu Bapa dan Guru (PIBG) serta komuniti, kedua-dua sekolah melaksanakan aktiviti gotong royong pada 10 Mac 2019. Gotong royong tersebut memberi tumpuan kepada kerja pembersihan kerusi, meja, tingkap, langsir, kipas, lantai dan penapis penyaman udara. Pembersihan menggunakan cecair antiseptik yang disumbangkan oleh sebuah kilang bahan kimia dan dibuat melalui tiga fasa (8 pagi, 10 pagi dan tengah hari).

Kerja-kerja pembersihan dilakukan oleh pekerja pembersihan, guru, PIBG dan turut dibantu oleh Skuad Ponteng SMK Tanjung Puteri Resort, pekerja kilang bahan kimia, Majlis Perbandaran Pasir Gudang, Pelabuhan Tanjung Langsat, Jabatan Bomba, Jabatan Kesihatan, Pejabat Pendidikan Daerah (PPD) Pasir Gudang dan sukarelawan. Timbalan Pengarah JPN Johor turut berada di sekolah tersebut dan semuanya berjalan lancar. Tiada mangsa yang terkesan ketika aktiviti gotong royong dilaksanakan.

Kesan Insiden Pencemaran Kepada Warga Pendidikan. SK Pasir Putih dan SMK Pasir Putih beroperasi semula pada 11 Mac 2019 (Isnin) dan taklimat keselamatan telah dilaksanakan. Yang Berhormat Exco Pendidikan Negeri Johor, JPN Johor dan PPD Pasir Gudang telah melawat dan memantau situasi sekolah.

Pada jam 11.30 pagi, insiden gelombang kedua telah berlaku dan Jabatan Bomba

mengumumkan keadaan udara tidak selamat serta mengarahkan premis sekolah dikosongkan. Pasukan JPBBB digerakkan dan Pusat Gerakan bencana dibuka di Dewan Serbaguna Taman Pasir Putih. JPN Johor bekerjasama dengan Jabatan Kesihatan memberikan penjelasan tentang isu ini kepada warga sekolah dan ibu bapa. Sekolah tersebut ditutup bermula 12 Mac. Pada tahap ini, seramai 32 murid SK Taman Pasir Putih mendapat rawatan, melibatkan 17 orang dimasukkan ke wad dan 15 orang sebagai pesakit luar. Seramai 27 murid SMK Taman Pasir Putih telah mendapat rawatan dengan 21 orang dimasukkan ke wad dan enam orang pesakit luar.

Pada 12 Mac 2019, simptom pencemaran udara akibat sisa kimia tersebut telah dikesan berperingkat-peringkat di sekolah lain. Awalnya melibatkan SK Tanjung Puteri Resort dan SMK Tanjung Puteri Resort serta sembilan sekolah lain di Pasir Gudang. Jabatan Bomba dan Jabatan Alam Sekitar mengarahkan sekolah-sekolah tersebut ditutup. Murid sekolah terlibat yang mendapat simptom tidak sihat dibawa untuk mendapat rawatan di Dewan Serbaguna Taman Pasir Putih dan Hospital Sultan Ibrahim. Dalam tempoh itu, seramai 242 orang murid terkesan dan mendapat rawatan iaitu 84 orang dimasukkan ke wad dan 158 sebagai pesakit luar. Mangsa merupakan murid SK dan SMK Tanjung Puteri Resort serta SMK Kota Masai.

Pada 13 Mac 2019, sebanyak 31 buah lagi sekolah di Pasir Gudang telah ditutup. Sehingga 6.00 petang hari tersebut sebanyak 42 sekolah KPM dan UiTM Seri Alam telah ditutup. Pada hari yang sama, Yang Berhormat Menteri Pendidikan telah turun padang meninjau situasi dan melawat mangsa di hospital dan Bilik Gerakan Bencana Dewan Taman Pasir Putih. Manakala Yang Berhormat Timbalan Menteri Pendidikan, pada 8 Mac 2019 terlebih dahulu telah mengadakan lawatan dan memantau kes tersebut dengan kerjasama padu pegawai-pegawai KPM, JPN Johor dan PPD Pasir Gudang.

Sebagai langkah pencegahan bagi memastikan keselamatan murid, guru dan pekerja sekolah, Yang Berhormat Menteri Pendidikan telah mengumumkan penutupan semua 111 buah sekolah di Pasir Gudang. Yang Berhormat Menteri Pendidikan sekali lagi mengambil cakna dan melawat Pasir Gudang pada 18 Mac 2019 serta mendengar taklimat daripada semua pihak yang terbabit dalam isu tersebut. Beliau telah mengumumkan semua 111 sekolah di seluruh Pasir Gudang terus ditutup sehingga cuti sekolah bermula pada 22 Mac hingga 30 Mac 2019 sebagai langkah keselamatan.

Sehingga 18 Mac 2019, insiden pencemaran sisa bahan kimia ini telah menyebabkan 587 murid mengalami simptom masalah kesihatan. Daripada jumlah tersebut, seramai 450 orang murid dimasukkan ke wad. Terdapat juga empat orang guru mendapat rawatan di wad.

Secara keseluruhannya, sebanyak 42 daripada 111 buah sekolah di Pasir Gudang terlibat menerima kesan langsung dalam insiden tersebut.

Untuk makluman Dewan yang mulia ini, saya ingin mengulangi kenyataan media Yang Berhormat Menteri Pendidikan pada 13 Mac 2019 bahawa KPM memandang serius isu ini kerana melibatkan risiko nyawa kepada murid, guru dan pekerja sekolah. KPM menggesa penjenayah yang melakukan kesalahan berat ini dibawa ke muka pengadilan dengan segera. Walau bagaimanapun, cadangan pampasan kepada mangsa oleh YB Parit Sulong adalah di luar bidang kuasa kementerian ini. KPM akan terus memantau situasi tersebut dan mengambil langkah membantu warga pendidikan terlibat melalui mekanisme sedia ada KPM, seperti sesi kaunseling berterusan dan tuntutan bayaran insurans perlindungan murid. Sekian jawapan saya. Terima kasih. Tuan Yang Dipertua,

### Isu Scammer

#### 2.47 ptg.

**Dato' Sri Dr. Santhara [Segamat]:** Ucapan dari Yang Berhormat Segamat. Tajuk ucapan, Isu Scammer. Tuan Yang di-Pertua, pertama sekali, saya ingin mengucapkan setinggi-tinggi penghargaan kepada pihak kementerian yang sentiasa berusaha untuk membuat yang terbaik untuk memajukan dan memperkukuhkan infrastruktur Koridor Raya Multimedia (MSC) demi kepentingan rakyat Malaysia dan juga menyumbang kepada pembangunan Malaysia.

Selaras dengan itu, industri e-Dagang telah berkembang dengan pesat. Namun begitu, terdapat segelintir golongan yang tamak telah menyalahgunakan kemudahan ini. Sejak kebelakangan ini, terdapat banyak kes-kes yang membabitkan penipuan berjuta-juta ringgit oleh pihak-pihak yang tidak bertanggungjawab. Golongan *scammer* sudah semakin berani dan dilihat seolah-olah seperti kerajaan tidak mengambil sebarang tindakan efektif untuk memastikan tiada lagi kes-kes sebegini.

Penggunaan platform aplikasi media sosial seperti *Facebook* sudah menjadi lubuk mencari mangsa oleh golongan *scammer* dengan mengiklankan produk pada harga yang sangat murah dengan tujuan untuk memancing mangsa. Penggunaan sistem "*cash on delivery*" (COD) oleh syarikat penghantaran tempatan dapat meyakinkan lagi mangsa mengenai kesahihan pembelian mereka. Namun, melalui sistem COD ini, pembeli masih wajib membuat bayaran terlebih dahulu kepada wakil syarikat penghantaran sebelum barangan

diserahkan kepada pembeli. Terdapat banyak kes di mana barangan yang diterima tidak sama seperti yang dibeli atas talian. Apabila pembeli membuat aduan kepada syarikat penghantaran, aduan mereka kerap kali tidak dilayan.

Banyak barangan yang dijual atas talian adalah dari negara China dan perlu melepasi saringan Kastam Diraja Malaysia untuk ke Malaysia. Persoalannya, adakah barangan-barangan ini diisytiharkan dengan betul dalam borang deklarasi kastam?

Pihak kementerian diminta mengulas secara terperinci mengenai langkah-langkah yang telah diambil sehingga kini untuk menangani penyalahgunaan ini. Adakah pihak kerajaan bercadang untuk mendaftarkan dan mengeluarkan lesen untuk mengiktiraf pemilik-pemilik platform eDagang? Langkah ini dapat memastikan pengguna hanya berurusan dengan peniaga berdaftar dan bukan *scammer*.

Pihak kementerian juga diminta untuk menjelaskan, apakah kriteria dan mekanisme yang efektif yang sedia ada untuk pengguna mengenal pasti laman web yang sah dan bukan penipuan dalam talian. Adakah pihak kementerian mempunyai rancangan untuk memperkenalkan sistem pendaftaran untuk portal-portal perniagaan atas talian dan juga untuk mengenakan tindakan undang-undang terhadap peniaga-peniaga yang membuat penipuan atas talian? Isu penipuan atas talian semakin lama semakin menjadi barah dan mempunyai potensi untuk merosakkan imej negara ini. Adalah diharap oleh pihak kementerian mengambil serius isu ini dan seterusnya memperkenalkan penyelesaian yang efektif untuk menanganinya.

#### ■1450

**Timbalan Menteri Komunikasi dan Multimedia [Tuan Eddin Syazlee Shith]:** *Bismillahir Rahmanir Rahim, Assalamualaikum warahmatullahi wabarakatuh* dan salam sejahtera. Dengan izin Tuan Yang di-Pertua, pertama sekali diucapkan setinggi-tinggi terima kasih di atas soalan yang telah dikemukakan oleh Yang Berhormat Segamat. Untuk makluman Ahli Yang Berhormat, bahawa kegiatan penipuan amnya tertakluk di bawah Seksyen 415 hingga seksyen 420 Kanun Keseksaan yang mana ianya berada di bawah bidang kuasa pihak Polis Diraja Malaysia (PDRM).

Manakala, Kementerian Perdagangan Dalam Negeri dan Hal Ehwal Pengguna (KPDNHEP) pula bertanggung jawab kepada penguatkuasaan undang-undang dan peraturan yang berkaitan dengan urusan jual beli dalam talian atau di luar talian. Dengan peningkatan peniaga eDagang di Malaysia dan pada masa yang sama peningkatan kes penipuan dalam talian, kerajaan telah memantapkan Akta Perlindungan Pengguna 1999 dengan



mewartakan Peraturan Perlindungan Pengguna (Urus Niaga Perdagangan Elektronik) 2012 yang juga diletakkan di bawah bidang kuasa KPDNHEP berkuat kuasa mulai Julai 2013.

Walau bagaimanapun, kementerian ini melalui Suruhanjaya Komunikasi dan Multimedia Malaysia (SKMM) akan mengambil tindakan dari sudut teknikal sahaja iaitu apabila sesuatu kes dirujuk secara bertulis oleh PDRM atau KPDNHEP. Setelah menerima permohonan dari PDRM atau KPDNHEP, SKMM akan bertindak dengan menyekat talian telefon dan laman sesawang yang berkaitan. Siasatan teknikal dengan mengenal pasti suspek juga akan dibuat dengan menggunakan alamat dengan izin, *internet protocol* dan bukti-bukti digital forensik yang ada, sebelum hasil siasatan diserahkan untuk tindakan lanjut PDRM atau KPDNHEP.

Tuan Yang di-Pertua, seksyen 420 Kanun Keseksaan memperuntukkan hukuman penjara dari satu sehingga 10 tahun dengan sebatan dan denda. Manakala Akta Perlindungan Pengguna 1999 pula memperuntukkan hukuman denda sehingga RM200,000 dan penjara maksimum sehingga lima tahun jika sabit kesalahan.

Selain itu, KPDNHEP juga telah melaksanakan langkah-langkah kawalan terhadap laman perniagaan dalam talian seperti berikut bagi menangani penipuan di dalam talian:

- (i) menggalakkan peniaga dalam talian mendapatkan pensijilan Suruhanjaya Syarikat Malaysia (SSM) *BizTrust*;
- (ii) mewujudkan satu pasukan khas bagi pemantauan secara proaktif dan tindakan secara responsif ke atas aktiviti dalam talian;
- (iii) menjalankan naziran dan bekerjasama dengan pengendali tapak pasar dalam talian (*online marketplace operator*); dan
- (iv) bekerjasama dengan SKMM, PDRM dan *CyberSecurity* Malaysia (CSM)

Sebagai usaha sama dalam menangani isu *scammer* ini, SSM telah dan akan terus menganjurkan pelbagai program bagi meningkat serta menggalakkan penyertaan orang ramai dan usahawan untuk mendaftarkan perniagaan dalam talian mereka dengan SSM. Sehingga 28 Februari 2019, sebanyak 162,541 entiti perniagaan dalam talian yang telah berdaftar dengan SSM.

Bagi memastikan ekosistem eDagang yang lebih selamat kepada pengguna di dalam talian, KKMM melalui *CyberSecurity* Malaysia turut memberi perkhidmatan Pensijilan Malaysia *Trustmark* untuk sektor Swasta (MTPS) bagi operator eDagang untuk mencapai status sebagai pengamal tingkah laku eDagang yang baik, berdasarkan skop yang ditentukan oleh

*World Trustmark Alliance* (WTA). Mana-mana operator eDagang, secara sukarela boleh mendapatkan pensijilan ini bagi meningkatkan kredibiliti perkhidmatan eDagang yang mereka tawarkan dan mengesahkan laman web mereka adalah selamat untuk digunakan, dengan izin.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Selasa, 26 Mac 2019.

***[Kamar Khas ditangguhkan pada pukul 2.56 petang]***